

泊鷗山房集

泊鵲山房集卷十三

駢體二

曾稽 陶元藻 鳧亭

祭文

祭周左西先生文

惟公汾陰妙裔細柳雲孫才類廣武學同鴈門戀蓴菜
於湘湖洲中泛宅挹清風於元度郭外成村不履不衫
非狂非魯縱遇交新還存吾故訝孺子兮長貧羞噲等
而爲伍風爐蠻榼水水山山畫稿吟牋今今古古茅齋
十笏王維得南垞之莊隙地數弓庾信有小園之賦蕭
然杖履五百里道德荀陳老矣鬚眉七十載衣冠巢許

況夫門跨濟美譽有超宗熟三篋之枯蟬無煩鑿柱躍
雙龍之神劒詎俟開松白鳳才雄射文光於北斗紅綾
宴賜列玉筍於南宮方羨鯉趨捧檄燕喜登堂徵幣則
遠投角里看花則同到河陽水虎火龍無憂無疾陽烏
陰兔且變且翔而乃峯顏中嶽星淪少微塵封藥裏蒿
沒荆扉想公瑾之醇醪音沈響絕望濂溪之光霽物是
人非某等情若師承分如父執桑乾河畔難憑東郭之
棺石塢峯前誰執西周之紉千山凍雪疑白馬之奔馳
一束生芻盼靈旗之來格

祭多明府文

遊露歌寒松門日薄允耶非耶或驚或愕蒼苔翁仲影
憐沈氏之鐙細雨棠梨香到滕公之柳君東陽威鳳上
谷名駒家督則勲高召虎伯兄則賦重吳郡朗朗山行
產璠璣於藍岫軒軒霞舉挾雲漢於天衢美豈長貧智
勝刺船之孺子病非多渴才同題柱之相如惟某與君
也實以孔李通家爰締盧劉密戚山陰謝女敢誇柳絮
之工天壤王郎原屬烏衣之傑西窗翦燭對芍藥而聯
吟北里傾樽共珊瑚而架筆自鳬飛於花縣漸隔鬚眉
當月落兮屋梁猶逢顏色若乃洛水洲前一行作吏桃
林驛畔三度聞謳衣繡服以持躬拳帷望重席羊皮而

率下遺積風流水掬成舉盆底之沈寃立洗霆驚什谷
田間之謫訟齊收羊叔子之碑文哦殘峴首郭細侯之
竹馬迎滿并州正著循良還期騰上楹夢洩其鵬飛徇
悅豈衡魃其一至遽墜喬柯何閱水以千翻忽成頽浪
某盧蒲髮短燭武精亡感姻親於秦晉痛知交於郗王
割地分天旣無緣以掛劒傳魚鴈鴈空有泪以沾裳封
白骨於青山誰爲阡表愴陳根而宿草聊寄椒漿

詔封一品夫人崔母李夫人祭文

珮返瑤池雲沈寶瑟模橫羣閨榮哀終古珠翹辭命婦
之班鶴駕引恒圭之侶條桑館裡斷繡女之機絲玉鏡

臺前折嫦娥之桂樹恭惟夫人鄴侯譜牒柱史門閭祖
德稟金精之氣家風傳玉帳之書秉女誠以端莊性由
天授擅鍼神而聰慧巧與人殊制憲大人伊呂勲崇夔
龍德劭以博陵之望族早歲求凰惟隴右之名閨初笄
見廟盤區榛栗孟德曜婦職能修沼沚蘋蘩桓少君禮
儀逾妙和諧鼓瑟薄射雉於如皋交警鳴雞異勺脩於
京兆夫人相從官閣共泛星槎鞠服炫燕臺之日魚軒
穿洛下之花蘭佩芬芳初來湘浦絳雲舒卷看到瑯琊
閩海澄波共姬姜以澣濯吳山濃黛照尹媼之笄珈捧
榮誥於九重繽紛集祐荷

襲綸於三殿稠疊增華矧夫衣綵歡多庭芝秀擁諸荀
會食有躍皆龍羣薛傳觴無鳴非鳳床頭繡祿摩頂而
嬉砌下羊車含飴以弄一門獨貴山河期偕老之麻五
世其昌星漢獻雙輝之頌而乃香銷寶鴨塵罨雲裳鵲
啼淒楚蝶夢蒼涼四姓金張虞歌聯篋三江潘陸輓唱
盈箱華祝箕疇雖純禧之已備商霖周袞悵內助之云
亡歸華表以何年徒言城郭畫甘泉於此日空式珩璜
某等同沐憲恩敢忘懿德情切瞻依心增悱惻傾玉女
之峯巒墮天孫之刀尺雲籤垂仙姥之經彤史著蘭臺
之筆薦椒醴以陳詞聯霞旌而來格

誥封一品夫人崔母李夫人祭文

斐掩瑤臺蘭凋洛浦錦瑟鴻離瓊釵燕去浙閩失壽母
之儀型江漢隕金閨之砥柱袞衣霖雨誰襄贊於帷房
月殿星橋竟淒清於薤露夫人性敦淑慎儀秉端莊博
士標名續蘭臺之十卷鍼神擅譽織天錦於七襄出隴
右之名門河冰春泮歸博陵之望族樓鳳簫揚惟制憲
之崇勲崧生嶽降宜夫人之懿範尹姁齊姜踵懿美於
二南聿修蘋藻著徽柔於三楚克事蠶桑迨賢良服政
之年皆婉孌從游之日茂漪書格簪來燕市之花道韞
詩篇賦到梁園之雪紉芳蘭之楚佩重協熏爐看如絳

之齊雲華分畫翟御魚軒以東下跨斗連牛浮綵鷁以
南來襟吳帶越豈類梁鴻困約荆釵隨廡下之居并殊
徐淑分離錦字寄雲中之翼況復家有名駒門無凡鳥
四傑俱佳三珠逾妙翩翩鳳羽飴且長含隊隊羊車膝
還並繞蕊珠宮裏盡雕龍繡虎之才玉鏡臺邊俱東箭
南金之寶惟葛覃與樛木仁與慈周故華祝與箕疇德
隨福劭則見母儀四德官閣三台曳紫拖朱衣盡平陵
之綵香羹銀鱸調餘婁護之梅列架上之圖書五千瓊
笈擁廊閒之婢媵十二金釵咸仰轅門真同閨苑由來
閩海原近蓬萊倚杖劉樊宜佩長生之術齊詣梁孟同

傾偕老之杯而乃桂魄晨寒嬾星夜落漢川逝終古之
波夏口返何年之鶴庭前蘭桂頓生失怙之悲天上夔
龍爰製悼亡之作緬楷模於翟茀禮備榮哀顏梁棟於
閨帷魂游寥廓某等海天下吏縲絏餘生竭愚悃以礎
綿殷同葵藿沐憲仁之稠疊深比臺澎雀未酬恩驚摧
鍾郝蛇難報德痛失譚邢困轍枯魚聞虞歌而倍楚解
縲窮鳥獻椒醴而彌誠

祭石母趙太夫人文

白山之閨範云亡瀋水之壺儀頓毀荀龍旣哭撼瑤扉
臨鳳亦號崩女几卜居有教歛歛填孟氏芳鄰截髮無

入縞素滿陶公故里秋風鶴返山閒華表空留春雨牛
眠松下佳城鬱起冷煙霞之板御騎省園中式金翠之
華裾甘泉畫裡太夫人清獻華宗平原望族志靜而專
性柔且淑風高林下之姝譽滿房中之曲適明河之快
壻京邸乘龍偕金谷之名儒盤山挽鹿春鷗秋蟀長引
晨機芳菊香椒時陪夜讀書堆翡翠續成十卷天文筆
倚珊瑚賦就兩行銀燭少婦則饋同家婦雪濺魚羹良
人則性類山人雲縫蕙服溫恭內助聿符天上雙星婉
孌宜家克備人閒五福蘭芽早茁鳳羽高騫西清薇映
東觀藜燃鱸賜蓬池白髮且沾恩歲歲衣頒宮錦春護

復含笑年年駐室雙光神夢表丹書之異憐才一飯王
孫感巾幗之賢翟弗南游樓船東下就養輜軒分營官
舍映北堂而左右采石青山列鎖院以縱橫名都白馬
斑衣相對原無藉乎倚閭廉石親攜又何煩於封鮓心
馳上國帆轉秋濤翠翹金雀珠帕雲袍課膝下以賢勞
孫吳韜畧勉庭前於忠盡裒鄂弓刀季子昂藏鵠鵲侍
垂貂之貴文孫娟秀瑯琊稱辨稻之豪周公瑾之慈闈
才同齒茂張齊賢之母氏德與年高方謂引養引恬永
朝永久桓少君儀表如初邾夫人神明似昔觀孀星之
燦爛輝逾長庚扶鳩杖以婆娑壽宜平格魚軒象服看

命婦之頭行鳳詔鸞章荷

君恩之載錫而乃蘭機梭斷漪墨牋亡依稀彤管淒愴
黃腸蕙幄乏千年之藥瓊田少四兩之香鵲有血而皆
枯左嬌徐淑猿無腸而不裂衛女齊姜閭教難追鄰春
響絕徽音莫溯巷哭聲長捧檄心懸孟貞曜春暉空慕
牽裾人往魯皋魚風木徒傷濂洛生徒輓唱滿條桑之
館貞觀將相虞歌繼飛絮之章某等與嗣君春光杏苑
盆馬看花秋月瀛洲分牋事硯祗因孔李交游得仰郝
鍾令善璫璠羅拜纔承壽酌以如新鸚鵡傳呼忽隔瑤
池而不見赴王珪之宅裏誰鑒英賢登韋逞之堂中疇

談經傳浣花翁在思畫紙於江村椎髻人歸失齊屑於
鴻案瞻鈿箱之塵滿月蝕金墓弔黛梳之膏空釵留玉
燕拳丹荔以陳辭潔芳蓀而跼奠疑瓊珮兮鏘鳴盼蓉
旌兮宛轉

祭汪母徐宜人文

寶婺星沈羸樓簫斷人間之萱不常榮天上之月難恆
滿蜀岡賸雨淒涼玉女之窗邇水鵲啼嗚咽條桑之館
宜人東海流徽南昌紹緒敏慧鍼神柔嘉織女晨巾夕
幔步叶珩璫秋蟀春鷦功勤筐筥播賢聲而如湛善禮
賓朋降素志以從周殷憂門戶贊襄中饋初無越分之

嫌羽翼坤儀克著齊家之矩相隨畫舫遠侍長安牽帚
瑤階郎署備清塵之職熏香寶鴨朝衣護曉露之寒承
畫筆之風流常分黛梳對明珠之錯落自揀金盤白水
聞歌能辨齊臣之意紅蘭入夢遂成燕姑之歡蛾眉方
千里相從君子復一麾出守青鴛繡佛洛伽禮薝蔔之
雲翠幙燒鐙甬上佐荼蘼之酒對晴湖而拭鏡日月東
西撫玉樹以開顏機雲左右冲庵公倏天漢騎箕喬宜
人又喪車馭柳長城莫倚倉皇屢痛之餘大廈難支淒
楚重凋之後宜人則米鹽醯醬砥自中流蒹藻蘋蘩擎
來赤手南鄰北里仰巾幗之鬚眉芳戚懿親欽閨帷之

山斗而乃德門衍慶珂里徵祥禮以富生膝下固無慚
於象笏母因子貴天邊已

寵錫夫龍章金雀珠翹婆娑繡闥魚軒翟茀掩映瑤廊
鳳輦雲移新闢平泉之墅鯉庭恩渥宛開畫錦之堂婁
膳郇廚江鯉何誇漢水棠舟桂檝板輿寧羨河陽宜慈
竹之春輝無盡知南陔之愛日方長何圖藥斷瓊臺藕
枯玉井寶蘭沈沈銀缸耿耿黃腸驚薤露之歌秋水隔
菱花之影罷倚閭於此日天姥峯傾思封鮓於他年女
郎砧冷某等封楊戚屬衛樂姻親鶴怨芝田悵壺儀之
不再雲橫洛浦慨懿範之如新忝葭莩而繼綵藉蕉荔

以紛陳庶珮聲兮未遠來昭格兮今辰
誄

處士邵君瑞先生誄

公諱光美字君瑞蕭山人也東陵種瓜世有故侯之望
南陽出守人稱慈父之風代著清德由來舊矣公天上
祥麟人閒隱豹瑩其心鏡則塵埃不染擴其情田則町
畦不設陸士龍老屋三閒揚子雲殘編一架籜冠蠟屐
石鼎藜床晏如也母氏病藥餌濡牀必躬承其事衣不
解帶身不煖席者日無算凍林努笋冰河上魚孝水欲
枯悲雲忽起泣血螻乎王哀毀性同乎和嶠以殮以窆

靡不盡禮公之事親可謂孝矣上有伯兄雖齊侵魯地
不無燃萁之憂而遲郤邊金仍開映樓之萼兄卒以父
禮事之昔有萊州之牧今見堯夫之裔先後同揆尤可
羨焉凡有貸於公不能償者悉焚其券有驂皆脫無袍
不贈楚漁父之拯急詎少蘆吟趙公子之憐才定多絲
繡至若芙蓉秋水高駕置梁楊柳長堤紛堆錦石殘山
落照青松招誰氏之魂荒隴寒雲黃葉掩何人之骨轉
成瑣事烏能縷陳嗚呼過聚星之里猶憶賢人問通德
之坊空懷長者椒聊蕃衍經史芬芳豈無謂哉誄曰
寒城菊華幽山桂樹汝南高躅扶風故武金粟颺風銅

魚泣雨劒賸藏林書畱裂柱安埋舄佩局秘冠裳和松
瘞月嵇鶴眠霜于公門大榮晉龍章

邵母蔣孺人誄

乾坤卦象西方分少女之功鐘鼓詩篇南國仰夫人之
化以之觀德家政修焉孺人姓蔣杜陵尉之骨貴死且
爲神廣都長之才宏顯而成器衍慶有年篤生名媛敬
軒先生乃其父也長而歸邵於姑則孝於夫則敬於子
則慈而有訓於已則儉而不陋紙窗蓬壁恆見鑑青柳
浦漁洲時聞砧響秦簫簫與趙瑟同和秋蟀與春鷓相應
邵公義俠好施與孺人力助之步擗玉紫卸供縞紵之

交條脫金黃賣作麥舟之用飯彼困饑豈獨韓侯拯爾
貼危居然翟母尤可難者僕車盜米賓筵失杯古來原
有其人今日詎無斯事而乃我不眾播彼卒自修視傾
篋如鴻毛願成人於圭璧豈涼德褻釵所可同語哉邵
公之賦鵬鳥也年纔三十七歲孺人之赴同穴也壽已
六十九齡中閒相去春秋如許衣食經畫手口卒瘁秦
皇之厚窮罄築以懷清齊侯之重賢婦封之石窀兼而
有之夫何愧焉嗚呼崇徽蕙穆堪登彤管之書峻範松
喬咸式大家之訓誅曰

范母淑慎鴻妻令善九閭是法七德無玷洛濱返佩月

殿歸娥賤零漪墨錦斷蘭梭有象應圖有文在手林下
之風閨中之秀悽愴坤儀雉衣未授鳳羽翩翩瀧岡石
久

墓表

徵仕郎丁脩山先生墓表

於戲是爲徵仕郎脩山丁公之墓虞歌旣闕馬鬣維崇
嗣君自崑神悽愴其奚極涕洟瀾而未收乞余表隧之
辭謝不能文允而後起夫少微殞宿幾同舟壑潛移通
德標門不與鴻泥颺沒龍蛇夢而顯晦斯真邱山歸而
毀譽乃定則夫翔步魏闕策名天庭旂常垂箕尾之芒

鐘鼎統豐城之氣固吾道之昌也若其隱非隱吏非吏
形骸放浪步劉伶阮籍之後塵里黨觀摩具太邱彥方
之一體亦儒行之選也公諱任嵩字豫宗號曰脣山派
出鄴下裔出臨淄瓜瓞則七葉金貂閭閻則三重畫戟
生於康熙辛未八月十四日慧惟天授孝本性成其事
父一齋公甚謹趨庭之受不惟其再問寢之職罔懈以
三旣而父官餘杭公與母沈太君以祖母吳太君春秋
高畱養於家舞來綵服笑口頻開賦彼蘭陔晨羞彌潔
池亭雖暑風消江夏之蚊籬落非春雪努黃州之笋年
三十二母氏沈卒明年父卒越四年而祖母吳卒又八

年而生母曹卒我命不辰遭此多難祥琴之輟莫計其
歲春相之寂遑問以時心傷雛哺泣獨甚於皋魚讀廢
蓼莪性同毀於和嶠對羊棗而不食昔有是言捧哀梨
而永懷今無其偶尤可難者扶父櫬過錢塘之夕曹太
君與焉陰霾晝黑狂飈野號陷楚王於澤中途段姑於
津口滅頂之凶酷於鴟革覆巢之禍烈比膠舟黃腸悽
惻幾爲若敖之魂白髮鬚髯恐葬江魚之腹而乃破指
瀝血罔象爲之神驚碎首籲詞支祁爲之泣下風姨歛
跡川后效靈望之者載沈載浮涉之者如鏡如帶天降
爾康人受厥福其感格之故豈徒王鯉躍於泚泚姜泉

抱夫滾滾哉至其嫉小人唾猶泥滓禮君子願爲執鞭
謝元暉之獎及孔閭穎巧叔之言感鄭莊轉成細事不
足多矣矧一瓢日月蠹綽魚經十笏山河蒲編柳簡抒
軸而川原助其氣揮酒而月露濡其毫其柰銅雀妖姬
能矜叔子金莖仙露不賜相如井大春僅樹幟於諸生
元次山復觀碑於太學念雄飛之可慕受夔憐而未甘
南山霧中或藏文豹東華月下空夢紅香任羣鬼之擲
揄遂終年而飢憐文而不貴窮且益堅列職銓曹非其
志也於是寒園十畝老屋三閒問青旗於紅葉村中招
白衣於黃花籬下以麴部爲可狎以醉鄉爲可居烟汀

月嶼有人時說山頽蟹舍漁莊何處不逢鯨吸玉船波
湧便鬪奕而裁詩銀海鱗飛姑投壺而射覆飲一斗飲
一石此中疑有聖賢卜平晝卜平夜萬物視同蠓蟻昔
者荷鍤隨車漉巾在甕黃公壚畔嵇康從而夕醺習氏
池頭山簡歸而倒載以彼方此其情可知景命不融享
年五十以乾隆庚申九月十五日卒配吳太孺人嬪則
維柔女儀克婉舐膜療目閨壺推孝子還金積德巾幗
爲丈夫於公有內助焉丙寅三月十四日年五十八卒
同窆於茲子二長曰澍卽自崑也次曰洵孫男三孫女
四萬石家風應徵犀角于公子弟綽有龍文蒸蒸日上

詎有艾焉然而靈衣不復形管誰傳徐景山之酒船紅
螺剩影孫蘇門之嘯咎彩鳳無聲於戲郭泰死而中郎
有激楚之文馬敦亡而安仁作悲涼之誄將使寶蠶不
走炫色金刀漆炬常燃流輝瓊樹夕陽古壠行人摩十
字之碑明月深山仙侶聽千年之鶴

表

擬謝

聖母皇太后萬壽開鄉會恩科表

伏以聖心崇愛敬瑤圖增星甲之文哲后廣聰明珠榜
列天辰之彩春到萬年枝上暖徧藍袍祥開五色雲中

榮分玉筍，翳仙廚之箋脯。書帶同長，煥銀漢之鈎鈐帷。
鐙益朗，椒塗凝馥。茹連貢楚，神茅蓬島。流霞波助，搏溟
健翮。寶鏡則字懸仁壽，金臺則轡接驂騑。藝圃咸興，儒
林丕振。臣等誠惶誠恐，稽首頓首。上言竊惟圖開義畫，
坤爻著爲母之功，政紀周詩，壽考啓作人之化。粵自雲
根煉手，擎鰲柱於中天。日角承顏，繞文英於北斗。瑤光
月貫人傳，景僕之奇虹彩。墟流史載，握登之異姜嫄履。
武斂開姬室之鴻基，簡狄祀高禰衍湯孫之令緒。蓋聖
人首出，聿推誕育之賢。而傑士挺生，尤荷徽柔之祐。爲
元爲愷，稱才子者實分。閒氣於辛陽，若禹若皋，應名世

者曾識靈徵於堯舜歸五人於穆考教本思齊
於寧王化由文母商周而上固有隆規漢唐以來亦多
盛事池飛靈鳥光搖赤石之珠神捧金輪瑞叶猗蘭之
殿布銀花於火樹延泰名高移雉尾於雲簾宣仁續懋
然而興寧興慶詎上壽而傳登俊之文永信永安誰祝
釐而闢謗升之典未有黃裳多祉增隋珠卞璧之輝泰
運方亨振案雪囊螢之秀仰長庚而染翰萬國攸同懸
蕊榜以祈年四方來賀如今日者也茲蓋伏遇

皇帝陛下愛日心誠求賢願切煥堯衣而問寢斑斕舞
日月星辰從周道以尙文遠近徧詩書禮樂鴻詞徵辟

率推科目之條經學搜羅更在篇章以外固已班香宋
豔俱成鐵網珊瑚蘇海韓潮足勝江洲鸚鵡渤澥無遺
珠之悵珪璋皆登席之珍矣欽惟

聖母皇太后陛下教啓修和德涵貞靜篤生瑱馨含章
獲元吉之功誕育羲軒應地得咸亨之慶乃以花甲周
天之候正屆黃鐘協律之時葭灰與瑞雪齊飛彩線共
銀繩並永神壺宮闕新字宜年竺國如來夙名無量花
棚鐙市十五國歌舞盈畿寶埒銅溝二十里樓臺湧地
演諸天之梵笈香護經壇降列洞之仙鸞雲連藻衛金
函晨啓晉徽號於宮庭寶籙晴開集祿祥於翟茀資生

德懋早鍾川嶽之英錫類功深大得風雲之氣念青衫
獻賦旣格中破格拔最精者九人憐白屋懷才復科外
設科俾允升者萬國詔以壬申之歲用開鄉會之闈萃
多士以稱觴集羣賢而祝嘏恤朔方之寒士蠶月賓興
體遠道之公車花朝鶚薦攀來丹桂翻從楊柳春陰咲
罷紅綾卻映芙蓉秋豔風簷樺燭條條列海星之籌彩
管瑤篇字字衍箕疇之語聽鹿鳴於繡甸華祝同聲聆
臚唱於仙班嵩呼台響千秋金鑑傳來月殿前頭五緯
星精聚到瀛洲深處架天梯而凌碧寶級連登催雷火
以騰紅神魚百變惟石逢媧后須臾而漢布雲霞亦絳

貢天孫頃刻而機成錦繡臣等板輿學御玉尺羞持類
蒲柳以滋生望岡陵而仰止念小人之有母捧檄生歡
願夙夜之在公薦賢獲賞倚閭而望倚門而望停雲深
反哺之恩朝拔其尤暮拔其尤宜力抱同升之媿向陽
如草木將附雲卿星景共坐春臺報國有文章還與鳳
臧梧萋同登壽域伏願堯門衍慶禹甸呈材符日月以
升恆俛玉燭金甌齊鞏固於八千爲歲育菁莪之暢茂
將春華秋實咸鼓舞於億萬斯年頌悠久以無疆盡英
雄而入穀庭護階莢年年集王母之禽璧月珠星夜夜
照文昌之度扶杖耆庶老與國老會云快覩昇平憲言

者上庠及下庠俱曰願爲舟楫則如柏如松如川如阜
續延齡之翠縷真成地久天長而自東自西自南自北
振華國之元音都作和風甘雨矣臣等無任云

擬謝

恩諭頒賜一統志表

伏以皇仁垂大地縹緲崇經濟之書聖典著雄圖鵷鷺
得遵循之路列河山於掌上藜火分功錫方策於天邊
宮雲繞筭一侯一尉俱在星羅碁布之中四極四和咸
歸繡錯牙分之內飛隨木鳳只到金缸畫戟之家出自
丹青不同翠管銀罌之賜臣隣誌喜簡冊流輝臣等誠

惶誠恐稽首頓首上言竊惟聖人御宇合八表以來同
哲后當陽廓九圍而是式粵自苞符乍啓義皇著俯察
之能洎乎草昧初開軒帝立方隅之準繼巡行而有事
封山卽以濬川緣荒度以成功則土因而作貢章南亥
北總步履之無差壤自黎青亦田疇之可辨度九區而
定軸計程歸鄧長之司配列宿以承天分土重保章之
職裂疆置郡肇自嬴秦拓地開邊始於炎漢道通邛焚
早詳司馬之文傳列朝鮮首倡孟堅之筆緬關中之形
勝都歸潘岳文章憶洛下之規模具見陸機辭翰唐封
極盛著元和郡縣之圖宋室胥安作太平寰宇之記度

四履於眾路肇以開平輯一統之全書成於景泰凡此
網羅散失不無粉飾鋪張至如吳越春秋僅載銀濤鐵
箭廣州風土只稱鳶水羊城宗憬之荆楚歲時固瑕瑜
之不掩嵇含之南方草木亦荆棘之未除未有合兩戒
之原隰山川詳列金函玉版薈八紘之城池都邑編摩
竹簡縹囊協坤體之凝承雕梨鐫棗煥乾文之麟炳璧
合珠聯爰分內府之儲咸使外庭之守如今日者也茲
蓋伏遇

皇帝陛下德被堯封情周禹甸業維鼎盛從鴨綠以開
基運啓昌明藉魚紅而敷教固已左圖右史幽風與無

逸俱陳大法小廉天保金采薇均治會其有極歸其有
極樂同文之治者航海梯山莫不來享莫不來王輸向
日之誠者瞻雲就日矣乃以一統志實關政治已具成
編諸大臣共事國家誰能指掌上之御府僅供清宴之
餘典在有司未廣敷施之澤特加頒賜用慰觀揚內自
閣部大臣外及封疆重任牙籤玉軸猶帶藜光錦幘青
箱遙馳星使但見峩峩天府高枕居庸浩浩王畿平臨
碣石鄭滄德棣窺溟渤以浮沈朔代幽并挾滹沱而上
下二陝乃咽喉重地終南太華翠分輦下之雲中洲本
襟帶神區少室嵩山暖近長安之日香生灃浦溯蘭佩

於湘壘聲落錢塘聽潮迴於犀弩埋金建業榮光騰牛
斗之精飛瀑匡廬高社奪江山之秀豔紅藤於夏簾聚
飲花田飾翠羽於秋簾微吟棠閣彩雲一片詔臨金馬
之祠雪棧千盤鴈叫蠶叢之路黔方遼濶乃番徼之門
庭閩嶠嵯峨亦島夷之臂指占城日本會錫指南大廈
康居皆知拱北阿耨達之情形可覩覓點斯之脈絡堪
尋三百卷霞蔚雲蒸廿一門條分縷析疆以戎索疆以
周索將淳漓奢儉合宜毛宜介之繁六族殷民七族殷
民并沒革乘除盡氣斃氣仁之數豈獨鷄聲馬色詩著
蒲關菊秀蘭芳歌傳瓠子大同宣府九邊壯屯守之觀

馮翊扶風三輔有雄圖之攷哉臣等智窮坐井術媿談
天素無縮地之方祇恃借緇之學太冲雖博都傾寫而
惟三平子何奇京鋪張而僅兩笑蕭何收圖籍酌古未
必準今度郭璞注山經挂一還虞漏萬幸見幅員之廣
化周侯甸要荒忻觀冊府之繁盟固河山帶礪伏願量
符高厚德合清寧被四表以流輝尊親罔憚率萬邦而
在宥覆載無私江自岷山淮自桐柏河自崑崙漢自嶓
冢與五嶽五鎮俱成聚米之形太蒙人智空桐人武丹
穴人信太平人仁兪三賦三登齊作列簪之狀將見卿
雲普覆冀葉叢生玉帛更進於塗山拱球日隆於虞陛

游麟滿園偕洛龜河馬以呈祥舞鳳盈階與綠字赤文
而永煥矣臣等無任云

擬謝

恩頒三希堂石渠寶笈表

伏以聖學啓圖書瓊筭溢雲霞之氣皇躬親翰藻琅函
發蟲鳥之光灑雨露於天邊文峯翠繞散珠璣於日下
墨沼春移倒薤紛披珍殊翠管銀罍之賜懸鉞森列榮
甚鷄彝龍勺之頒格似女以簪花鼓催花發勢如鴻而
戲海目送飛鴻驛路騰歡鸛行稱慶臣等誠惶誠恐稽
首頓首上言竊惟哲后陳爰而畫卦天文兼察人文盛

朝覺世而牖民心正自能筆正粵自摹形穗秀靈闢炎
皇取象奎垣神通蒼聖垂六書於鎬洛蝌蚪縱橫變八
體於嬴秦龍蛇拏攫唐內廷裝潢滿几多屬右軍修禊
之書梁御府籤帙盈廚無非大令授衣之帖啓昇元而
甲乙翥鳳翔鸞集淳化以摩挲鈎銀畫鐵雲扃竹葉行
行東觀之編秋冷松聲字字西清之譜攜送梨於德壽
繭紙三弓秘裏鮓於宣和濤牋一幅然而太清樓之續
刻挂漏猶多淳熙閣之新刊收羅未廣況韭花春草不
聞冰酒同頒青李來禽幾見露蕭並錫未有星羅碁布
璧合珠聯大一統以成文奉三無以成化垂魚擁笏咸

瞻雲漢昭回梵宇名園齊荷瓊瑤輝映如今日者也茲
蓋伏遇

皇帝陛下學超三古文煥八紘藝圃遐搜風雨會芙蓉
之殿書田廣潤煙雲堆翡翠之牀固已參三體以稱神
運雙鉤而作範跳龍臥虎合乾坤變化之奇春蚓秋蛇
儲山海崇深之富矣猶欲公之天下布在人閒自中外
之重臣暨巡游之勝地亟邀恩賚登舞鶴之堂階均捧
貞珉獲廻鸞之淵藪纂排三十有二卷窺豹真全上下
百三十餘家望洋斯大爲甲秀爲寶晉爲鐘鼎未足比
其精華若黔江若武陵若長沙何足仿其美善魚紋細

皺數叢羣玉之箱隼尾斜分幾疊黃庭之籙館停雲而
已圯偏逢大輅長舟堂快雪而將頽饒得枯蛟渴驥歐
陽嗜古悔昔年駐馬之觀蕭翼工書陋當日停舟之乞
或趨朝之尙早弄墨晨書或退食之自公燃脂瞑寫流
輝毫素離宮則仙仗增華交碧珊瑚佛舍則神猊角健
靚雲移於五朶鐵限將穿看霞捲兮千重鸞羣不換鏘
鏘屈玉如探大酉之繁閃閃生金儼挾西崑之瑞臣等
江花未夢蒼雨空聞知濡髮於何年媿畫沙於前哲識
同酌蠡少筆虎之雄觀才僅塗鴉負墨猪之俗誚雖左
有潭而右有絳坐井終微今晉可楷而唐可模臨池何

幸伏願萬幾多暇乙夜維勤石渠雕玉與虞夏鼎以
長畱寶笈懸珠共義瑟嫺笙而永煥昭示則千秋有鑑
臨摩則百代爲宗駕南康星鳳之前超北宋蘭亭而上
將見寶章有集不獨烏衣玉潤傳芳何須金紙碑題黃
絹爭含麟角之毫欄界烏絲競揭鴨頭之帖曰隸曰篆
曰籀芸窗雪案咸生博古之誠或行或草或真澤國山
區共沐同文之治矣臣等無任云

擬印信滿字易鑄篆文

命卽頒行各官員謝表

伏以聖王崇制作赤文同綠字以俱新帝治啓光華玉

筋與金虬而並勒煥蒼書之寶篆潤色隆平闡義畫之
龍文網維寮案銅符虎節分頒帶礪之盟墨綬銀章參
攷蟲魚之府薤葉則倒披可辨嘉禾則垂穎堪摹四海
同昭萬邦稱慶臣等誠惶誠恐稽首頓首上言竊惟王
者合八紘以示信躬桓與蒲穀均施聖人大一統以成
文鳥火與雲龍並紀翦桐賜履已開璽綬之門金範銅
鑊聿創雕鏤之事佩來蘇季色豈泥青封向陶朱彤原
斗大盛鐫摹於斯相不少及書收圖籍於咸陽殊多繆
篆趣銷趣刻見威加猛士之風司記司言實簿掌尚書
之府獻瓊瑤於上谷誰刻龍蛇墮鵲石於張門偏鐫忠

孝任鵠盤而龜紐一時倒用司農非棗刻而桃刊三道
斜封諫議四字增而七字減繚繞霞光先繫地而後繫
官連綿鳥跡然守已成之法烏能因革咸宜垂可久之
模務在變通盡利解岐陽之獵碣無益朝常識岫嶺之
殘碑何關國政未有理宗河洛道契苞符酌彼史游程
邈之文正以鳳閣鸞臺之制昭如雲漢使百辟其同風
貴等珪璋定千秋而作範如今日者也茲蓋伏遇

皇帝陛下文敷四極道炳三辰握金鏡以調元瑞呈刻
玉運璇圖而經世麗合頒璜固已畫鐵鉤銀盤麟曲鳳
肘懸纍纍徧鹽梅舟楫而無遺章定煌煌傳侯甸要荒

而維久矣猶以舊譜可翻新制滿字宜易篆文俾百爾
之欽承本宸衷之獨斷筆將飛而能轉秋螭盤釵字輒
整而無斜春鸞對鏡蓋音由轉注停勻配九疊之形而
體係凡將對待著雙輝之象覩鴨頭兮宛轉冶鑄銀黃
狀魚枕以摩挲陶鎔金紫珍逾冀豆備有芒有角之精
寶甚帷彝昭或掌或封之重繡鞶囊而掩映啄喋分胥
開殊匝而細縕彎環豁目煙霏霧結全殊晉鄙之符鰐
伏駝蹲絕異錢鏐之券笑夏侯之一匱奪自邊疆陋段
頰之百枚制非天府胃羅日月布蝌蚪於臣鄰筆摘星
辰走麒麟於官吏臣等功惟削楮學儼懷鉛六書昧黑

聞之名半職負素餐之誚攷說文於許慎紕繆徒多間
奇字於揚雄艱深猶畏無功塞下敢邀新息之封有綬
懷中曾學會稽之守媿微勞之未効欣盛事之特逢伏
願典則丕昭規模盛遠成文合采憲章騰奎壁之光大
法小廉報禮盡股肱之職式序實惟有位牙璋媲美周
京恪守著在葦工竹冊齊榮宋室將見行諸薄海盤旋
覩字裏之金窠降自丹霄愛護異民間之木契爲簿書
爲案牘莫不瞻丹篆而文治離明若奏章若文移亦益
視硃鈐而官方整飭矣

臣等無任云

云

擬謝揀選會試下第舉人以知縣教官用復蒙

恩諭賜七十八十以上者國子助教翰林院銜表
伏以

聖朝崇經濟風雲搜蕊榜之餘

帝世重賢才圭璧鑒冰壺之下種杏花於上苑落處皆
香扶桂樹於仙巖老來愈茂曝腮文鯉重聞躍浪之聲
鍛翮秋鸞都作凌霄之舞會耆英而乍榮輦帶杖靈壽
而並陟春臺仕路歡騰儒林慶溢臣等誠惶誠恐稽首
頓首上言竊惟國家頒爵祿原無成格之拘廊廟策馳
驅爰有多方之擢達聰明目虞廷擇楨榦之材兆夢圖
形傳野卜鹽梅之器漢家取士設立四科魏室求賢分

昭九品雖坊前宮錦或羞舊樣寒花而巷裏民謠漫笑
飛歸冷燕愍初平之耆宿試罷則聽授舍人訪靈武之
遺賢選補則何嫌故戚拔張河於證聖豈在文章官李
白於開元不由科目百篇難就尙蒙及第之褒一韻偏
忘且獲成名之寵延平博士鳩杖維新天福書生鰲頭
已白榜開五老世傳劉象之年賜徧諸生人踵齊賢之
武然而送人作郡羅友徒嗟爲子求官館陶未許長鳴
冀野誰憐伏櫪之羣棄甲于思莫恤敗兵之將未有收
得爨餘桐尾忽飾朱絃採來網外珊瑚枝重量玉尺泰交
成運銅章將雪案齊明壽考作人鶴髮與魚鬚金麗不

與紅綾之晏已分紫綬之光如今日者也茲蓋伏遇
皇帝陛下孝治日隆賢門廣闢披袞裘而舞綵推恩及
耄俊之班進玉食以承歡錫類大顯揚之典鄉闈旣放
固快凌雲賦就朗唼月殿前頭會榜初開還虞抱璞人
歸長嘆荆山深處

特頒恩綍普恤公車旣詳揀用之條復設加銜之寵開
九天之閭闔日就雲瞻平七政之璣衡龍優豹劣三條
樺燭曾歌鳴鹿而來萬選青錢毋悵遺珠而去聽鶴聲
之一一飛上青天看鵲序之行行分投大地花光繞郭
寧輸騎省名材鳬影連雲知是尙書舊履鄭廣文談經

槐市苜蓿堆盤胡安定講學芹宮舉比擁座蓋丁年玉
樹已看銀艾垂腰而亥字銅仙又見綠蛇蟠肘人如巢
谷忽稱國子先生齒近商山盡號瀛洲學士訝盧蒲之
髮短芝蓋飛藍幸燭武之精亡泥書錫紫康真是樂捷
音報柳冕之奴放且不回笑口啓杜羔之婦失意翻成
得意知人自易官人臣等稽古何功薦賢無術三彈劔
缺方疑曲逆長貧一割鉛刀忘卻馮唐易老媿素餐而
作吏壯不如人聞秉鑑以衡才耄思好學無邊雲路引
他阮籍之窮有腳陽春行到孫山之外伏願虞絃解慍
軒鏡流輝噓朽木於鄧林時通千佛名經之滯昇散仙

於蓬島常慰十年不字之選劉蕡則下第無憂祖述則
先鞭可慶機邊賸錦俱成補袞之資水底寒金不盡披
沙之揀將見千人爲英萬人爲傑明登公選齊翼珠星
璧月之旁朝拔其尤暮拔其尤老養賢尊無非威鳳祥
麟之侶矣臣等無任云

諭

重修惠安縣志諭

徵文考獻志乘爲先激濁揚清纂修尤重河渠食貨實
關太史之陳土俗山川上備輶軒之採記歲時於荆楚
詎類卮言訐月旦於汝南同垂金鑑豈爲河陽地勝徒

誇滿縣之花不緣勾漏砂盈僅述長生之事惠邑省會
咽喉海濱藩蔽左仙右晉顧盼稱雄跨斗連牛精華孕
秀才人絡繹鄭成之文學無雙循吏聯翩盧希韓謀猷
第一可無方策聿昭故府之莊敢廢圖書反俟裨官之
補慨嘉萬中張黃兩輯祇說前朝卽康熙閒朱氏一編
難矜善本訛成亥豕漫云前事之堪師變盡滄桑尤貴
陳言之務去況我

朝之數教化已百二十年縣治之去京師僅七千餘里
陰陽和會金張增舊第之華天地清寧唐魏改當年之
陋士女旣林林而庶原田益每每其豐而紀載荒蕪網

雖闕失傳疑傳信廢興莫辨於觚稜不備不醇因革難
尋於煤尾此固邑人之怠抑亦守土之羞也本縣欲纂
成書用貽來哲始謀興事已欣同志之多旋勸捐金更
慰急公之盛茲特遠延名宿於本月初十日開館署中
晨書填寫勿憚勤勞遠紹有搜還虞挂漏雖出門合轍
權衡自具於匠心然集腋成裘薈萃終資於羣力念宰
官下車二載未周見見聞聞惟爾等生長此邦定識原
原本本方諸釀蜜宜採百卉之香譬彼爲鯖願備五侯
之膳合行出示曉諭爲此示仰闔屬紳士耆民書吏地
保等知悉凡志中應載事宜各照所開條例星速呈報

若兵農若禮樂瑣瑣何嫌曰忠孝曰節廉多多益辦承
平佳話願諮洛下衣冠荒邈遺聞還問襄陽耆舊庾開
府之散帙應有五存杜征南之殘碑豈徒一谷無稽勿
錄原非棘問齊諧有物方陳免誤黃甘盧橘共襄盛舉
毋負虛心

修延平府志諭

川原高下備載職方土壤剛柔詳登禹貢舍咸陽之圖
籍阨隘難知無柱下之縹緗雲龍莫攷所以承流下土
不廢編摩奉朔遐方皆珍志乘農桑悉具實輶軒訪採
之資教化攸關亦太史陳詩之義豈若齊諧棘問徒垂

悠謬之談并非盧橘黃甘僅炫子虛之賦延平乃省會
襟喉天垣脈絡兩漢則帶礪盟深五代則屏藩地壯論
其林壑克踞閩甌吳越之奇溯厥英賢疊徵朱李羅楊
之粹處上游而控制易樹先聲當衝要以安全大殊僻
壤則志之較於列郡也爲尤重矣聿自宋端平之歲始
有成書迨乎黃仲昭之時曾稱踵事諸邑雖各藏有冊
無非片羽殘鱗前明卽屢易芸編都付零煙碎雨今所
存惟康熙十一年閒前守蕭君所輯之志蠹成脈望混
帝虎以難明響絕廣陵罷宮商而莫繼况自三藩煽孽
狐鼠憑餘四郡搖烽兵戈劫後問烏衣之門巷舊燕雖

來鑿漢武之池塘沈灰莫辨九十二年井疆非昨幾感
滄桑三百餘里文獻無徵徒嗟杞宋可宗可守將掠影
以奚從傳信傳疑常捕風其何益宛似人歸獵苑寂寂
弓聲幾同龍去溪潭茫茫劍氣本府職膺守土廢墜是
虞政切觀民昭垂安在歷五年之夙夜敢憚勤勞察六
邑之澆淳畧知梗概捐輸首勸有事雕鐫館局宏開遠
延名宿準今酌古每商榷於酒闌燭跋之餘別戶分門
已參攷於煤尾蛛絲之外第欲貽畱於日後畧不如詳
轉憂闕失之年深因偏若創其有一行作吏績類龔黃
七步成章才高鮑謝或修子職無閒人言或式鄉閭克

占星聚九熊劃荻心堅化石之操賦菊吟椒字寫簪花
之格瓣香賸蠹尚可追尋潛德幽光未經揚扃者願徵
其實各舉所知名山玉簡固裨河渠茅舍農書俱關食
貨佇觀集腋早成公子之裘敢曰補天輕煉媧皇之石
共襄盛舉毋負虛心

寧紹台三郡觀風諭

蛟門鳬渚大有奇蹤華頂瓊臺殊多靈氣潮趨東浙乃
越王創霸之鄉驛過西陵卽夏侯藏書之地襟山帶海
濤聲與筆陣爭雄跨斗連牛星彩與文芒並煥四十一
人之冠蓋照耀蘭亭八百餘里之煙雲灤洄鑑水賀知

章本四明之狂客庾肩吾實天台之逸民王家則門盡
龍鸞謝氏則庭皆蘭玉寶帳中之秘帙論著王充發地
上之金聲賦推孫綽赤闌橋畔春風吹詠雪之牋黃絹
碑前落日照停車之客峨峨道岸陽明固理學無雙炯
炯元鑑石簣亦文章第一何必龍符光怪炫采人閒豈
誇醉墨淋漓搜奇方外惟山川之明秀自多名士風流
由習俗之醇良屢見賢人星聚本道關隴庸儒邊陲下
士曾攻舉業兩京莫繼於前徽謬列賢書三篋徒慚於
家學念簿書之久溷彌益荒蕪然鞅掌之餘閒未忘結
習一麾洛下不辭吐握之勤幾載閩中猶以揀揚爲樂

叨承

簡命幸蒞名區無煩興教之功偏切觀風之志雄窺三
郡才真車載而斗量秀競千巖文應雲蒸而霞蔚昔年
噩夢閒吟天姥之篇此日星輶親聽雷門之鼓山名蓬
島知有句之皆仙地號珠巖識何懷之非月是用分題
校藝授簡衡才宜今宜古各獻所長以雅以南不拘厥
體懷抱自成其邱壑免譏優孟衣冠捉刀勿倩於英雄
要識廬山面目經營各至羨馬遲枚疾之同工甲乙攸
分詎王後盧前之或爽短長踈密春華與秋實兼收濃
淡平奇東箭與南金並錄願從壁上快觀旌旗敢詡門

前廣栽桃李勿視余爲俗吏冀萬言試倚馬之才倘以
我爲解人竢五色酒生花之筆

引

京師繩匠衡衡關帝廟募鐙引

十方淨土每說傳鐙一片丹心曾聞秉燭炕脂鳳腦宜
垂玳瑁梁前翠絡珠纓應布琉璃界裏竊惟繩匠衡衡
關聖帝君廟當年佳麗壯采撿天舊日繁華榮光射斗
爲鯨爲鶴開四照以懸星非雪非螢朗千重而繞電其
柰滄桑易變塵逐蛾飛那堪陵谷潛移灰同燼落殘山
賸水難籠金粟之輝斷錦零紉不映銅盤之液雖神威

之常赫熱豈因人顧祀事之重新光嫌鑿壁聿修盛事
敢告同人捨焚膏繼晷之資爲集腋成裘之舉補考工
之餘技製就蒲萄出畫譜之新裁描來鸚鵡三山雲樹
都歸織女之絲五苑鶯花齊上鯨人之縠襍珠旛而上
下灼灼其華隔寶幔以參差明明如月無魔不伏更燃
牛渚之犀有史能窺載列咸陽之鏡試看玉蟲盈殿誰
非護法伽藍要知火樹爭春我是催花使者

西湖招賢寺募菩薩裝金引

蓋聞四百八十寺佛盡莊嚴三萬六千場金原散布法
輪廣運衣裳同日月爭明象教宏開肢體與雲霞並麗

映琉璃之寶地兜率爭輝飾鸚鵡於珠宮菩提生色諸
天歡喜大都集腋而成眾善因緣自可懸桴以應葛嶺
下古招賢寺唐會通禪師駐錫處也湖重修於五代改
字禪宗逮再建於

國朝更名清隱平橋架壑水挾雲流修檻扶廊僧隨鶴
步禽魚互戲齊沾花雨之香竹柏交橫深罨珠旛之影
逕通葛嶺精舍無雙門出錢唐名藍第一而乃鼓鐘無
恙忽香像之生塵幢刹依然訝蓮臺之掩彩當其伐毛
洗髓應著文明何圖刮垢磨光翻成憔悴孰黥其面難
敘龍象之瞻誰剝爾膚實下人夫之位悵沈迷於此日

佇照耀於何時雖云四大俱空豈可一絲不挂納甫來
三月虔奉一心每感歎於法王轉躊躇於空鉢羞窺佛
面無由點鐵而成思補天衣何處披沙而揀伏望好施
長者種福仁人盛傳慷慨之風齊發慈悲之願沐餘膏
於銀甕點綴空門資厚力乎錢神扶持寶相大開笑口
詎同周廟之緘妙顯真容殊勝范蠡之鑄將見精華晬
盎六橋柳色分黃神采飛揚一院花光競紫現祥雲於
淨土閃閃迎眸揚慧日於昏衢熒熒奪目聿昭震且永
煥蒙泉謹疏

泊鷗山房集卷十四

駢體三

會稽 陶元藻 鳧亭

賦

鶴處雞羣賦

以羣雞喧卑獨鶴超特爲韻

彼其養芝之田而品貴出閭苑以名聞頂含丹而砂曜羽
凝白而霜分非燕雀之能侶惟鸞鳳其可羣會對梅花
隱孤山而軼世還隨仙子越緱嶺而凌雲爾乃有懷未
遂無枝可棲雖頡頏於塞鴈竟溷襍於窗雞當警露而
方咲笑司晨之每啼埒堞徘徊望天空而氣沮藩籬局
促悵獸畜而脣低秉其孤潔受此囂喧胎化誰識松巢

漫言旣難登於雷鼓復何望乎輪軒肯受變憐乃託身
於非族不因人熱反爭食於家園辭叔子之庭戶困處
宗之書帷清獻之一琴安在岐陽之二堯相隨恥鳬鷺
之比類豈翰音之同姿跡以奇而寡耦性自亢而不卑
雌伏可嗟宜落落其難合雄飛有待何栖栖之是爲然
而修趾圓吭明心慧目閒逸儀容安詳飲啄具茲矯矯
固影隻而形單任彼嘒嘒覺濁皆而清獨昔年慷慨舞
吳市而爭觀今日淒其抱秦關而並宿不惜翁呼詎容
手縛豈乏同居何曾偕樂羽毛雪洗猶疑換帖之驚骨
相天成偏讓鳴皋之鶴陋他五德充來公膳之筵壽我

千年歸到遼陽之郭本華亭之邁種實陳寶之英標雖
種穀而若瘁豈關狼之稱騎貴賤攸分何異璠璣之陵
燕石蠢靈原別詎憂稂莠之亂良苗譬漢傑之襟懷羞
噲等以爲伍洵晉人之風度誇阿龍而自超是則湫隘
棲遲泥塗偃息雖乏其鄰何傷厥德因遇眾而彌見精
華惟不黨而斯昭英特願隨儀鳳佇呈瑞於
九重終効飛鵬看搏風於八極

畫竹賦

以何可一日無此君爲韻

幽分南岳修稱永和連昌翠束雲夢青羅抱虛心以有
德挺直節以無頗雖橫霜而披雪詎易葉而改柯卦筮

蒼筤想應爾耳師參玉版寧問云何則有管仲姬文與
可貌叢篁狀巨筇蘸墨淋漓揮毫帖妥旣迸石而初高
復倚松而欲躡七賢則嵇阮同觴三逕則羊求並坐風
梢槭槭疑吹嶰谷之笙煙葉離離勝鼓瀟湘之舵飾月
梁圓停雲少室鳳侶將翔龍孫又出衡貨殖而畝千報
平安而枝一切磋淇澳之賢嘯傲徂徠之逸埒道元之
繪水文武分波奪張璪之畫松生枯異筆微烘蜀紙每
枕岫而臨流淡抹山齋幾干霄而蔽日或黃或紫爲綠
爲朱挾春蘭兮共賞映秋菊兮不孤垂萬箇於寸縑雲
縫雨織列千尋於尺幅粉別香殊挹彼清陰足兔居人

之俗餐茲秀色何憂食肉之無爾乃參錯吳綾卷舒蜀
紙畫苑傳觀詩壇諦視如到申潛如經渭沚淩春雲而
鍾秀天豈徒然成青簡以垂勲物猶如此園林標翠籤
軸流芬影亭亭以式靡意飄飄而軼羣越國簌簌早傳
神於畫史揚州篠簜應職貢於大君

龍井焙茶賦

惟瑞草之芳烈實雲華之翠濃烈金爐以照耀堆露甲
而因重就燥妙炎蒸之用含英得變化之宗顧渚與涪
陵並著盧仝思陸羽相從或賤巖而貴洞且範鳳而模
龍以養以藏事俱嫌於鹵莽爲烹爲炙義總尙乎從容

卷之三
爰有西湖首推龍井仙釋宮庭煙霞綱領護短迎人薈
長繞境分晚蘭同緣巖芝併下下高高斜斜整整清漚
方零晨曦未炳絲籠交攜筠筐競逞舉纖手以分香攀
柔條而弄影采蘋覺春水之深把菊笑秋光之冷非鬪
草兮恆閒與求桑兮盍警五花烟辦摘來玉澗之橋一
串珠喉歌入風篁之嶺將參禪以妙悟每飯三甌先隔
紙以微烘頭綱入餅於焉架木編篁開棚列隊獸炭回
春雲牋闌穢火有取乎停勻燄無岐於向背氣不靡而
不剛光半明而半晦如溫蠶箔性緩堪依如護丹爐功
成斯退香以歛而彌深質以微而可焙原稱鷹爪拳縮

匪枯絕類珠塵紛紜不碎蘭心瓊瑣全殊管底之形雀
舌戎戎頓變枝頭之態燠而可久固日盛而月新積以
成多遂斗量而車載爾乃鑄設山家瓢尋水涯虎跑未
涸法雨猶賒拾寒樵之楫拙芟幽境之槎枒烟起則林
中避鶴濤鳴則竹裡煎茶浮雪盈甌涪翁獨解兼金比
價鄭宅堪誇仿北苑之瓊漿玉液陋南皮之沈李浮瓜
蟹眼翻時解渴勝銅盤之露雲痕吸罷通靈賽華頂之
霞彼遶谷之芳株蒙

聖朝之湛露舒秀葉於峯峯茁靈苗於樹樹恰當騎火
之時欣荷鳴

鸞之度

天子乃命良工乃咨老圃披拂風光敷陳器具陽燧上
探祝融下護造化爐溫陰陽炭煦鉅手均調元功順布
火則稱武稱文香則爲雲爲霧移寸晷以成能拭
重瞳而眷顧六班紫荀味讓龍泓七寶紅蓮光隨
玉輅微臣溜迴昧水愧呈鴻漸之經草木知春敬獻瓊
芽之賦

舜有羶行賦 以天下歸之如蟻慕肉爲韻

文明拔萃濬哲開先姚墟初毓負夏重遷雷澤與河濱
交勵齋夔合底豫同傳風雨啓洪濛之運璣衡開於變

之天和氣則靈徵玉琯薰風則慶洽冰絃一行一言無
非從善成都成邑應易輪年六七族笑殷民之少八百
國嫌周室之偏飽德本乎飫心熙熙而往望氣深於尚
臭貿貿而前此大美彰聞原多流馥而輿情景附遂等
趨羶也若其揜井方升捐階始下呼天何望於人知耕
隴殊憐其和寡深山鹿豕雖稱野處之歡涿洞龍蛇誰
訂同心之雅乃感孚有氣濃郁相通遂應召無方徘徊
不捨逢道途而流沫僉曰君哉談齒頰以生香羣稱帝
者彼如桂海走螞蟻而山圍此似華元啜羊羹而杯瀉
一嚮共恣勝奔朱亥之門五鼎中調擬宰陳平之社老

幼相依親踈莫違重華自協元德真稀洵若決江河而
大原非食糠覈而肥允恆芻豢之悅何憂季女之饑陋
征葛之成湯如雲在望埒遷邠之直父似市方歸則見
所居民樂所去民思情彌膠固跡豈參差攝相非晚登
庸恐遲赴南河以愬也籲羣牧而薦之墳首在茲將旣
醉而旣飽元駒何幸乃載驅而載馳隊隊謳歌之侶紛
紛朝覲之車得分甘於七下詎借潤於棄餘初從飯糗
而薰炙繼隨玉食而吹噓不仇我而德我豈突如其來
如固無藉於脂塗能穿珠寶又奚煩於架竹早度河渠
要荒遐邇山河表裏臣服無窮子來靡已袂連踵接不

宮屯雲轂擊肩摩翻同鬪蟻八紘徵嗜義之誠九有著
悅心之美須識道腴獨厚各遵吾德之馨敢云肉食無
知反謂羣生之鄙是故物不妄投名無虛附克順人情
自膺天祚合十二州而皆親閱千百年而猶慕雝雝儀
鳳之聲穆穆垂裳之度其感何神其機何速遂敘偃草
之風轉類如陵之肉取譬雖近於荒唐寓言終歸於精
淑今

天子建極溫恭對時茂育俯念蒼生忘懷黃屋梯山航
海乃有路而皆遵秉璧陳書亦無思而不服懋宸修而
胞與大沛其膏見古帝於羹牆永綏厥祿

螢光照字賦

以能勵功必大成爲韻

芸編初展棐几閒憑熊熊燄伏奕奕光騰瑩分臺鏡朗
比壺冰龍無膏而何燭鳳斬腦而非鐙矧顏瓢之相侶
豈隋珠之可稱爰有囊螢之法遂呈照字之能腐草盈
園輕羅撲砌暉夜含芒丹良布麗羞白鳥而何廉出黃
金而獨異原非卻馬何藉皮封豈爲遊山寧須斛計來
觀鳥跡之繁灼見蠅頭之細陳三篋而縱觀發五車而
自勵鑿垣陋匡相之家映雪賽孫郎之第蒙絺閃爍透
練玲瓏旣分星而動碧復簇藥而搖紅夜黑則重帷電
走更寒則滿幌春融寧慮暗投敵虛室而生白不因人

熱卻金夫而有躬續彼寸陰補茲餘日豈與憐生遙同
月山勝燒絳蠟臘殘炬而易灰輪與蜃脂望鐙花而難
必硯就炙而凍驚蛾向明而路失鞠通在前脈望在左
金勛吾勤交懲爾惰添緇帙之輝輝滅井欄之箇箇遠
水面而莫飛近人衣而焉坐自殊石火之微何羨燭龍
之大熒熒活火一薪得歷聖之傳點點靈犀三昧進真
儒之座於焉炳文摛采含華咀英經明位顯學至名成
歸第煥金蓮之燄校書臨太乙之精煥藻火於殿陛變
陰陽於鼎衡慶重光之照耀荷玉燭之昇平

大禹惜寸陰賦

以惟聖希天健行不息爲韻

翳陰陽之迭運警歲序之推移樂純修以懋勉撫韶景
而思維非飭已於孜孜贊贊詎致治於皞皞熙熙寅亮
天工敢倦勤於此日精研晷度欲休暇於何時衡一刻
之春光黃金可值忽三餘之美景白髮難支仰彼夏王
聿稱神聖功以陰繩陰惟寸競心妙算於五行神潛孚
於七政每較短而絜長將策慵而鞭勁不存姑待之心
早去坐荒之病羽山回首方虞榦蠱之云遲玉簡關情
敢恃年華之未竟閱天喬之草木幾易枯榮恐胼胝之
精神頓殊衰盛念慇懃兮賓餞感輾轉兮璇璣勸靡寧
之夙夜審莫測之危微世上則南詛東作天邊則兔走

鳥飛石火能留應覺元圭非寶義輪可駐政從文祖而
祈彼尼父之假年情當彷彿或姬公之待旦心其庶幾
故夕惕而朝乾不勝珍重雖左臯而右益尙恐知希好
惠皇然持謙勉旃豈真駒到塗山隙偏易過恍若蟻窺
石紐磨竟輕旋思有夢以錫齡先開永晝想長繩以繫
日快對中天溯來癸甲辛壬幾悵韶華若駛撫此江淮
河漢還驚去晷如川戀清景而綢繆愛餘暉而繼綫惟
良辰兮是懷宜旨酒兮勿願幸聞言而輒拜心與峙忙
懼入域而未優詣如天遠載䟽載淪符震動而毋荒乘
橈乘車配乾元而克健蓋其惜之也如養寸膚無遺大

小如操寸管微辨虛盈如獲寸珠捧持恐失如憐寸草
顧盼彌精日起有功何來戲豫德精無閒自奏平成悟
百代之光陰原同過客笑八磚之學士徒愧躬行明月
二分漫羨揚州之朗榮光萬丈羣觀河水之清於焉集
其圖球美其冕黻謨著明堂貢昭方物播德音而莫其
振聲威於服不憶當年之惕厲早作夜思宜此日之敷
施東漸西迄今

天子應運乘乾建中立極大德常昭至誠無息宵衣旰
食繼禹服而垂勲日就月將永堯天而作則

蟻穿九曲珠賦

以題爲韻

乘照衢中驪探波裏金闕瑞垂瑤臺月起蚌含則合浦
初還蛇報則隋侯載喜非魚目之可淆實羊鬚之足擬
珍宜佩戴將縈織女之絲隙未玲瓏幾困鍼神之技緬
先哲之聰明笑羣生之弇鄙千金重鬻於緯蕭一綫潛
通於螻蟻若其羊腸紆折鳥道盤旋就曦每反映燭猶
偏走盤難定耀手堪憐窺茲竅末藉爾驅先引塗脂之
弱線尋漏日之光天似入耶溪山重水複如游秦嶺棧
接梯連勝架竹之浮橋行行獨步出攻隄之全力兀兀
來前元裡通元運天根而直挾洞中入洞循月腋而孤
穿彷彿靈窗危微寶牖賈勇搜奇驚心卻後其銳而進

也若轍巨而螳承其仗而趨也若山高而蚊負光明藏
裡詎同槐國之居窈窕巖中誰共元駒之走豈柴桑伊
邇開松逕而稱三訝吳坂匪遙曳鹽車而折九斯時也
人方懼其沈迷爾無憂於局促側肩如意處處離塵韜
影牟尼時時秉燭回頭彼岸幾虞繫日長繩放眼分陰
應快追風捷足何憂墜緒姑遠紹而旁搜取譬鏤冰真
同工而異曲於是綴諸簷幙繫諸衣襦嵌金飾翠賽瑾
凌瑜誇篋社之所採敵鮫人之所輸索象罔以益貴弄
芝田而自娛乃知事有奇功在揆情而度理天無棄寶
可問轍而循途惟微物之用宏巧真如匠亦至人之心

曠智本如珠仰

聖衷之克純非寶物之是慕卽壙水而有時已藏淵而
無數關

睿思而廣運鑑察靡遺駕闕里以多能裁成克裕旒開
日麗敬陳玉藻之篇曙後星懸願作明堂之賦

學問至芻蕘賦

以題爲韻

景古聖之虛懷溯先民之好學合四海以研摩彙羣生
而商榷能千慮而一得詎棄愚蒙善廣益而集思何須
卓犖此析薪有訓堪通道岸之津而刈楚能言遂勝驪
珠之握維彼芻蕘智鄰閭汶草木巖棲煙霞谷隱鳴禽

飛瀑常與囑于玉簡金書何曾撫捃雲中笑士雖來啞
啞之聲松下操柯徒得丁丁之韻悟理道而勿工講經
綸而未近卽有意於敷陳初何關於顧問而乃性道俱
融臣鄰咸治位參其三維張其四旣廣見而博聞復隨
材而器使適言必察欣茲野客之逢淺語自佳敢卻山
人之至將鳴輶而鳴鐸期慰心田詎采菲而采葑無資
腹笥義有分於高下詞何別於精粗納茅簷之里諺當
螭陞之良謨罔伏嘉言先覺翻求於後覺克襄明德殊
塗恍進於同塗緒觸彌長疑攀古綆情來如贈勝獻生
芻姑射之尋真已陋崆峒之訪道猶迂聲感通而特順

味含咀而偏腴聽到觀棋之暇傳來驅犢之遙獲清言
之賸賸通元箸之超超五老則聲符告瑞康衢則響叶
騰謠乙夜之鐘鏞並警進善之旌旆同招渾似夏王不
懈昌言之拜非如西伯僅游靈囿之堯言之者或不倫
而不類聞之者悉有理而有條何啻龍馬神龜能發乾
坤之秘遂與皋咨稷傲齊賡熙皞之朝方今

天子聖學已純宸修益裕囊括儒林網羅藝圃紹惟精
惟一之懷昭式玉式金之度要荒侯甸並荷帡幪棧樸
菁莪咸叨雨露乃復抑抑爲心乾乾是務萃西山蓬觀
以裁成并禹甸堯封而陶鑄

黼座勤勞懋著慶禮明樂備以垂休小臣瞻仰彌殷效
蠡測管窺而獻賦

春蠶成繭賦

以縈拂千緒經緯萬端爲韻

村中柘苗陌上桑盈爰降戴勝載鳴倉庚攀柔條而葉
落過懿筐而草縈惟春陽之方盛欣蠶事之方亨馬祖
聿崇龍精乃迄巧冠昆蟲靈超百物初分積而蟻屯漸
寸長而躡屈驚暮雨之旣零畏朝寒之輕拂依緹幕而
重圍近薰籠而微熨蠕蠕累百儻儻盈千伊文斑駁厥
性纏綿食葉則聲疑雨集繞箔則影似雲連婦警鳴雞
之夢廬明宿火之天奏功成於一月期候熟於三眠感

護養之深恩報酬敢後裕經綸之滿腹吐屬宜先則見
瞻顧徬徨徘徊延佇且卻且前若迎若拒得因依而肇
基恐觸根而墜緒薄霧乍籠層雲轉著謝絮晨堆吳霜
夜阻堅擬河冰圓同月杵或獨力而專營或同功而並
處外混沌而無痕內縱橫而有序工肖物以呈能善藏
身而自禦纁盆則雪浪爭翻織室則金梭齊舉七襄天
錦日華雲漢之章五色神綃月冷鴛鴦之杼充於筐篚
貢於

王廷綖人獻巧繪事呈彤龍超雉伏粉白山青儀型百
辟對越羣靈既賦緇衣之什還垂玉藻之經民免號寒

人無服卉遠達梯航轉輸侯尉星辰且石有支機禽鳥
亦聲摹絡緯攀枝吉貝羣推絲縷之奇鑿齒雕題咸識
冠裳之貴蓋其爲物也智本無雙功偏有萬難詳禹貢
之書不盡平陵之販再登非嫫女之遺八熟豈圉人之
願山紬雖密終同野繭之成海客何奇應媿冰蠶之獻
女紅方盛物力已殫毋輕敗絮勿棄零紈服章美於無
盡憫艱辛於造端惟

聖主勤民婦織與夫耕並重故羣侯來享陳球與職帛
同觀識蒼生之利溥覺造物之功寬率土衍同袍之樂
普天昭挾纊之歡

卮言日出賦 以因物通變惟彼之從爲韻

惟心聲之叶應乃義道之精真勝懸鐘以待叩誇抽緒
以相因星斗無酒漿之挹儒林有笥腹之陳果使多才
原何嫌乎專對豈須詞寡方標異乎吉人小詹詹而大
炎炎吐茹悉妙古原原而今委委醞釀彌新是爲卮言
之蘊遂昭日出之頻爰覺其迷爰宣其鬱誰曰不根良
稱有物傾羣液而恆精漱餘芳而未訖孚將盈缶堪益
寡以裒多智豈挈瓶勿左支而右紬身藏器而不漏口
懸河而不窮沈浸達情田之廣咀含得心水之通深汲
則時攀古綆元津則屢告羣衆三雅三升融入辭瀾之

富一斗一石漚成辨海之洪底蘊靡涯玉無翻輸於瓦
有取資易竭客滿何慮其樽空惟厚蓄而恆餘故分流
而胥善豈昨是而今非克守常而達變易滯則抱甕非
誇輕洩則建瓴曷羨濁賢清聖悟道岸之有階人醉我
醒發談鋒而不倦或淡而彌旨或潛而益滋義可參而
斟酌吐欲罄而淋漓周公瑾之飲醇同妙淳於髡之炙
輟何奇董江都之玉杯香生齒頰劉子政之說苑清沁
心脾義觸境而旋通真堪傾倒意探喉而卽得何暇思
維禮樂兵農輒津津於酬對工虞水火皆盎盎以陳辭
旣啓其端還窮其委陋括囊之無能笑繫匏之可毀闡

微析奧原非糟粕之遺
抒藻騰華彌著淳涵之美
吐圖書於唇吻蘭臭同
誰衍聖哲之淵源金罍
酌彼良以人愚可憫分
餘論於齒牙豈謂余智
自雄矜多能於爪觜
洪惟

天子執中應運建極乘
時音則爲金爲玉言則
如綽如繇將融六經而
一矣直配二典而三之
非衡尊之可擬豈蒙莊
之所知世法世守民信
民從

鳳詔似雨風之協

宸章若江漢之宗內秉
淵淵之德外昭繭繭之
容舜日堯天共凝承而
健運商彝夏鼎齊翕受
而靈鍾振元聲

於八表仰大智於

九重

藏珠於淵賦

以君子非貴難得之貨爲韻

三華璀璨九采繽紛採驪殊品吐鳳超羣南越以蒸苻
爲異大秦以眞白是聞薦雙丸於漢室致一簞於吳君
映瑤臺之夜月護金闕之重雲爾乃折水呈潭圓流在
渌象罔可求軒轅不使夫餘有酸棗之珍河上無緯蕭
之子沈泥滓而自清守蛟龍而勿徙璫垂赤水之中釜
覆長淮之裏由所寶之惟賢故所藏之若此圓融文鏡
礪砢名璣羊鬚半似魚目全非沙揚金而母巨蚌應月

而胎肥濺浪上湘君之珮隨波走漢女之衣鶴舞猶遲
烏含尚未蛇豈報隋乘寧照魏鯨宮則月朗千門貝闕
則星聯五緯韜滄海而非遺隱丹泉而獨貴陋匣邊之
玳瑁雕飾徐陵嗤座上之珊瑚鋪張石尉故雖價侔如
意聲高木難九芒雲澤七曜琅玕誰封玉臂不揀金盤
都沈激浪齊汨鳴湍浮火齊於洲芷集官雨於汀蘭合
浦初還阿鈎舊植一寸二寸之形青雲白雲之色帷鐙
於甕社湖頭浴日於波斯船側輝輝孕樹葉雖落而恆
沈曲曲流波蟻欲穿而不得豈復綴而成燭飾以爲旗
千金是戀一尺常思問西域以索獻命商邱而詠之也

哉洪惟

天子齋祓

宸衷清明

黼座惟稼穡之是珍乃珠璣之悉唾雖垂蒼王之衣何
羨黃枝之貨等雉裘之可焚擬珀枕而欲破呈銀甕以
凝祥開明堂而受賀

多文以爲富賦

以儒者崇學多以爲富爲韻

典墳可討邱索是娛陰爭分寸理積鎔鉅原非薄殖應
稱太儒幾馳驅於六藝勝囊括於五都豈以約而爲泰
常將有而若無金石可歌原憲寧輸乎猗頓簞瓢足樂

顏回詎讓乎陶朱華國經綸名山風雅勿助勿忘心藏
心寫非外強而中乾殊彼眾而我寡克上紹乎先民將
下詔乎來者燃藜秘觀之中映雪寒窗之下虛而能受
勞則有功道渾渾而涯濶腹便便而笥豐左史擅宏通
之譽鄭僑爲博物之宗樂耨禮耕味道獲膏腴之美
升堂入室宅心得輪奐之崇煥乎席珍溫其抱璞挹之
彌清滄之不濁汲方深而綆修簣已加而山卓李供奉
則錦繡爲心楊德祖則珠璣在握五千言柱下之藏三
萬軸鄴侯之學五車並著八斗同科氣疑霞蔚曾比星
羅懸鐘鏞而待叩成圭璧而如磨擬征南於武庫仿永

叔於洪河盧蒲嬖不嫌髮短陸士衡詎患才多古以敏
求言能遠暨篤實是徵光輝可擬合居今稽古之勲擅
緯地經天之詣爲師何患其有窮知爾寧憂於何以旣
漁獵以有年復肥羅而未已霍子孟方悔空踈令狐綯
應慚弇鄙蠡難輕測管莫全窺豹變與虎變並麗小畜
與大畜相隨甘屢空而自裕薄貨殖而不爲蓋孔門之
設四教也首以文而箕疇之衍五福也一曰富物豈貴
乎取盈學務期乎敦厚一經稱教子之良萬貫笑纏腰
之陋今

天子藝冠百王道高羣后籠絡儒林網羅文囿乃地負

而海涵非日將而月就是謂大有元亨於以化成宇宙

黃人守日賦

泰階永定玉燭常調雕題職貢鑿齒來朝惟

主極上合乎陽德故火精懸驗於層霄瑞靄翼扶桑之
樹榮光騰若木之條擁咸池而候早護濛汜而路遙邁
唐陛之素雲重圍紛郁掩函關之紫氣雙影飄飄儼若
拜颺列東西而捧璧宛同輔弼分左右而垂貂爛青旻
而載赫炫碧落而彌昭是謂黃人之象聿稱守日之朝
如鏡有函如鑑有幌匪懈寅恭自殷瞻仰臨仙掌之嵯
峨爛天門之詠蕩合烏兔而成三馭義和而得兩魯陽

望而廻戈夸父驚而卻杖配中央之色範土成形挹土
幣之輝鎔金爲像狀媿星如儀鄰月姊惟爾因依是誰
驅使燦燦明璫垂垂寶珥晷測微庥璣窺錫祉分新柳
而如驚迸餘霞而得綺疑捫手兮益親如入懷兮勿徙
華蓋同張絳衣齊煥拱衛彌尊凝承不散淺深則濃淡
攸分表裏則尊卑自判失大撓之所推豈容成之所算
扈從至鳥次之山供奉在寅賓之館雨師退跡風伯歛
容嶽霄壁滿印漢規重挽騏步乎細柳挾鳧飛於下春
閃爍九光似列郊天之玉盤旋四照還同負舟之龍金
甌盈溢赤道增新如夾非鳥不闕何麟天上有負暄之

曳雲中來曝背之民羽仗森羅朝旭無殊於亭午珠芒
焜耀盤盂詎異乎車輪

天子乃受羣賀御紫宸宣悅豫慰臣鄰命太史以書瑞
詣王宮而肅禋徧梯航而共就被葵藿以同春

天驪呈才賦

以月晷呈祥乾維效氣爲韻

龍種超騰河精突兀赭印花鬃峯騫天骨夾雙瞳而鏡
明逸四蹄而颺忽質方孕於流沙神早馳於丹闕關中
則飛電光生塞上則流虹影沒長辭苜蓿之霜新蹴蒲
萄之月業業山移容容月委歎玉爭奇負圖嬋美睥睨
深溝蟻蠓高壘圉人駭其驍雄太僕驚其瓌瑰登天關

而不慚食石粟而何累標八尺於羣駒致千里於寸晷
於是銜枚北伐仰秣南征軍同頗牧將類彭黥聽刁斗
於七校狎罷貅於五兵得騁絕塵之足敢忘伏櫪之情
荷顧盼於賢哲願倚托乎死生惟德先而力後故國重
而身輕馳突則無圍不破騰蹕則有敵皆驚縱飲於長
城邊窟徐行於細柳軍營齒雖加而步捷羈或脫而用
精狀似鹿夸久著技如龍兮畢呈若乃金鞍炫彩玉勒
流光銀嵌寶絡錦飾絲韁看花博望校獵長楊排仙仗
於扶荔翊鳴鑾於建章息轡於銅駝巷裏鳴鑣於丹鳳
城旁汗與桃而並落鬣將柳而俱揚笑駿骨於燕市憫

鹽車於太行爰著余吾之異聿徵炎漢之祥雖有紅陽
的爍紫燕連翩平陽朱翼隴右白顛冀騶樂顧屈乘荀
牽牂牁曳練黨項連錢躡景重祖龍之世奔霄傳穆滿
之年莫不聞大宛而卻步怯天馬而不前七十城風吹
汗血一萬里雪濺毛拳惟廣利之善取豈烏孫之敢先
應地支而配午占天象而符乾兩京著盛千里稱奇追
摹騷裏圖寫織離卷中索草壁上餐箕寧王以滾塵擅
譽陳閔以得骨表儀曹將軍之墨痕變化趙王孫之粉
本淋漓想渥注而目注緬元鼎而神怡窮丹青而刻畫
含毫素而思維更有詩握驪珠文成霧豹作賦徵歌題

形詠貌行閒則肅爽如奔宇裏則騶駼欲趨分斑管以
同麇騁鸞牋而應敎鋪張靈瑞之觀頌述昇平之效我
朝德與天幬化同海漑祉萃庥盈祥蒸瑞沸栖采鳳於
上林游文麟於象魏雉貢而越裳平葵來而西旅畏雖
遠人之是柔詎異物之足貴率舞徵百獸之容咸若著
太和之氣

臨淵羨魚賦

澄潭演漾芳渚縈紆靴紋斜織練影平鋪勝桃源之邃
境誇丙穴之靈區萃頰尾以堂堂揚鬚鼓鬣聚鯁鱗而
策策在藻依蒲嘯傲嚴陵雖有披裘之侶棲遲濠上原

非垂釣之徒則見湖平岸濶目想心馳欣然有會儼乎
若思惟川流之道在故魚樂而我知范少伯之湖真善
養鄭子產之池是誰司六角金四腮潑刺黃餘與白小
參差灼灼桃花肥應在水田田蓮葉戲或移時玉局則
松鱸巨口少陵則鮮鯽銀絲潛矣孔昭未獲入舟之慶
於哉充牣不關生釜之奇爾乃庚辛是辨丙乙攸殊腥
唇媲美熊掌爭腴朶頤欲卜動指非誣彼臥冰而可致
寧彈鋏而仍無載沈載浮遲連行於數里就深就淺動
煦沫於一隅宜佐清樽用陳綺席充我庖廚御我賓客
徙倚忘歸流連竟夕目旣耽耽情還脈脈類流涎於麴

車等適口於膾炙恐逝筭而發梁歛浮家而泛宅任公
無海上之鰲呂尚遲渭濱之璧鷁鷁獻謂似畫餅而徒
勞猿獺交嗤亦望梅而何益故夫物不虛附利不妄投
海上有信天之鳥人閒無緣木之求青箬綠簑宛同漁
父白蘋紅蓼仍泊虛舟漫說忘筌難免莊生之謂不圖
結網終貽董相之羞謀之有方取之有則不操機杼何
得裘衣不藉鎡基何來黍稷豈同楊震雀銜自至講堂
祇有琴高鯉跨無煩人力矧夫

聖化昭融鱗蟲蕃殖澤梁無禁乎

王朝魚鼈原資乎民食及三星之可期求九鼎之宜亟

將心逸而日休當先事而後得於焉眾目舉宏綱施矜
海客傲器師陋絲罟乎蜺翼笑竿拂於珊枝快鱗鱗其
若腴爰汨汨而來之彼物理之可鑑悟治道之如斯

風過簫賦

以無爲斯化有感潛應爲韻

紫雲質麗赤玉神腴帶牙編竹妃笙嬋竽管殊多寡底
分有無實羲軒之所製乃夔襄之所須必移晷而中窾
斯協律而可娛乃有封姨豎旆箕伯揚綏海波上立天
雲下垂始蓬蓬而齊發漸泠泠而獨吹經蒲都之筵上
送耶溪之水湄方起蘋而解凍乃鳴條而入帷與參差
以相值向空洞而悉窺觸元音於象外變奇響於人爲

真曲高而和寡若天動而神隨則見若揚若抑忽疾忽
遲旌上則風鈴益奏竹閒則風鐸交施乍凱南而涼北
已羽換而宮移豈漢靈之能喻非師摯之可知孔壁之
有聲如此陶令之無絃若斯廿四橋頭十三樓下蕭史
懷元鶴之翔弄玉想文鸞之跨奏吳市而未終吹越宮
而始罷天噓拂而無窮器應接而不暇散以聚而爲功
靜得動而成化惟空乃靈惟虛克受迄於無因始於何
有東天籟而細穿碎土囊而多口宛然律呂之生豈藉
伶倫之手幾番花信之餘一陣松濤之後性慄疾而善
投質玲瓏而莫檢大王之雄固足鳴少女之微亦易感

懷自悵悵味殊醺醺如蘗息而蟻行復雞睨而魚噉旣
而失屏翳退飛廉銅鳥靜鐵馬恬響沈沈而不作韻杳
杳而俱潛觸虛舟而不怒噓萬竅而何嫌洪惟
天子含大化而無私妙眾有而悉應居北極以處尊鼓
南風而操勝祥飈協五日之期韶舞奏九成之聽斯功
象而德昭乃禮明而樂定

水樂洞賦

以琤琤琴筑閒以鐘磬爲韻

湖光旣遠嵐影初重雲橫列岫雪霽長松入南山之邃
路探北宋之靈蹤拂晴鞭於款段倚丹嶂於芙蓉滂勃
林香孕就琪花瑤草斑斕石色鏤成蒼壁黃琮忽送清

音非關絲竹自無塵想頓滌心胷合丹井之澄波吐鱗
相應近九溪之春漲脈絡潛通爾乃洞因水著水以樂
名盛由嘉泰肇自熙寧滴滴雲動洋洋耳盈噴巖發響
趨壑成聲其合而倏分也則宮商不紊其斷而復續也
則律呂相生非練縈兮光素豈玉碎兮音琤夢鈞天而
莫醒觀季札而難評方謂數點峯青初罷湘靈之瑟詎
識一泓水碧翻來嶰谷之笙羌皦如其條理實淵然於
古今王壑則亭臺綺麗錢關則鎖鑰陰森杳渺東陽千
年疑似風流秋壑幾度搜尋移我閒情勾水勝成連之
海得其幽趣無絃悟彭澤之琴廿四番花風同斯清籟

十八瀾濤激逐此元音左帶烟霞右臨石崖跌宕瀾
迴環起伏邕笛桓箏蜀桐燕筑導雅宣和涵清渠濁等
藏書於孔壁聲振東山宛吹律於鄒生春融黍谷時漱
雲根常流花轡得雨增雄衝風入幻堂上與堂下齊鳴
大珠與小珠相聞數聲庾嶺之梅一曲平沙之雁候嶺
無殊豐山可擬夔曠過而徘徊魚龍聽而奮起分明鳳
管人來弄玉樓頭髣髴霓裳屐到廣寒宮裏才輪孫綽
鏗金方愧於無能技遇鍾期流水寧嗟於何以洪惟
天子巡禹甸狩堯封朝百辟省三農排仙仗考華鐘風
伯導雨師從揚珠旂之八鳳騰畫軸之雙龍地闢

宸遊天開

睿聽過淨化之香臺訪理安之靈逕如貢嶧陽之桐如
浮泗濱之磬觀嶽峙而淵停快禮明而樂定三台滙玉
澗之奇九奏擅虞韶之勝

牛羊勿踐行葦賦

以題爲韻

神皋日麗沃壤雲油孳生徧野萌茁盈邱羌一動而一
植乃或剛而或柔自益育而毋犯雖相值而何尤緬化
理之宏敷感深牧豎亦陰陽之善變喘罷吳牛寓物與
懷喻嘉庥於小雅揚徽著美傳公譙於成周若夫綿芊
山麓披拂池塘形隨荻短色擬葭蒼迎春方盛繞轍初

長蘼蕪競秀苜蓿爭芳幾偃風而克順聿向日而相羊
甘與芻蕘跡並西岐之往寧辭蹄齧枝同杞柳之戕爾
乃駕輶餘閒觸藩微物每避蒙茸慣憐慈鬱倘非驅者
之防能保蠢然之迄宛如麟趾履誰禁而恆無絕類甘
棠翦何傷而竟勿穗攜來於百粵智本如仙笛吹入於
三生心原似佛象應巽而毛柔體符坤而角繭初飲罷
於平池斯下來於翠巘非同馬埒之有閑不作牛山之
忽踐豈眞或繫滋蔓無凌縱有維羣菁英自展三百兩
桃林悉放未必槎蘂俱矜十九年屬國長畱恐亦榮枯
難辨披簑犢背賢誇五穀之司叱石山腰神等初平之

遺彼踏青之士女倏動驚疑在鬪草之兒童還增恹懣
惟繇惟天若拒若迎一任叢生而處常思閒道而行河
畔青青儼似鯢鮪之禁林閒濺濺終無蹂躪之驚戒爾
奔馳敢曰急何能擇同茲長養應貴時靡有爭得行人
而其途莫紊亡岐路而厥草猶榮化金農商讓耕讓畔
祥如風雨不破不鳴惟

王心仁沛乎蒼黔故民志慈流於萑葦敞春臺而樂育
物盡熙熙聞嵩祝以騰歡情皆疊疊騶虞仁獸疊至郊
圻莫莢靈根恆昭

黼辰蓼蕭湛露沾濡已徧於圉桓棧樸菁莪培養無遺

於詩非

韞玉山輝賦

以精神見於山川地也爲韻

寶徵稷翼瑞孕昌城瓊華爲宇瑤藥斯名惟不雕兮自
貴雖未琢兮已精隱巖戶而獨賞抱雲根而永貞潛藏
太素閱歷千春宅於奧窔護以靈神織女支機忽訝白
虹之灼襄陽呼丈頓瞻紫氣之新放眼崔嵬光昭五緯
排雲峩峩色炳三辰爾乃列嶂含英羣峯流絢經秋而
林炫奇葩不雨而巖驚廻電快荆岫之重逢幸藍田之
再見磊磊落落何來精衛之銜奕奕熊羆翻類媧皇之
煉繪圖難狀望氣先殊亞夫愛而不忍割秦皇畏而不

敢驅薜刺苔纏闕同金簡音沈響絕古金鐔于似初隕
於宋郊其芒莫掩倘能言於晉國有美宜沾蓋其韜五
德於虛牝匿三采於元關非抵鵲之易褻豈棲鳥之可
攀愚叟移時別昭氣象靈鰲戴處獨有容顏如繞圓光
千尋佛髻如施膏澤一片雲鬢價重嬰垣之品聲高獬
次之山惟抱璞之可尙斯點頭之非頑於焉良工下採
哲匠垂憐勝鑿險於劒閣賽釣璜於渭川磨礪拂拭攻
錯雕鏤爲圭爲璧作璣作璿丹水兆方流之異

帝廷稱特達之賢是故處爲席珍出爲國器擢袞服之
九章列侯封之六瑞昔年輜旃嶢巖幽谷之區一旦明

揚清廟明堂之地惟深藏若谷克保其真斯積厚流光
不言所利然則物之內有英奇者必外無喬野果理遠
而言充寧曲高而和寡蘭相如之完璧豈偶然哉陸士
衡之論文良有以也一篇黃絹願將瑜瑾以爲心百幅
烏絲試對嵩衡而摹寫

金吾放禁賦 以塵隨馬去月逐人來爲韻

傳柑令節插柳芳辰九華金燦七寶齊陳綴珠星於步
障散璧月於歌茵鳳管與龍簫競沸銀花共火樹爭新
簇繡線之衣香麝飄如霧擁銅街之人影翠落成塵金
張甲第田寶門楣南油滿室北漆盈帷龍銜燭而天矯

蓮生炬而歲稔院院之鰲山對峙邨邨之鶴燄相隨炫
華缸之若錦忘蟾魄之如規奪玲瓏於天巧窮絢爛於
人爲乃有六郡良家五陵豪者文輶五檠之車紫燕三
花之馬連鑣於鸚鵡窗前縱輿於鳳凰樓下瀏灏劒器
誰擅名高宛轉陽春詎言和寡攘攘嬉游喁喁笑語駭
百斛之螢飛慶五光之雲翥旣絡繹而來前復徘徊而
不去樂良夜之恆情願春宵之勿曙風中蛾火飛將太
乙東邊天半虹橋垂到廣陵深處蓋鐙輝元夕兆民卜
一歲之繁昌而禁放金吾終古仰西京之悅豫也豁達
天衢洞開金闕司寤戒弛抱關令歇將軍無咤叱之聲

廷尉息傳呼之率霞騰人海縱蹋擲之紛紜錦霽花柳
任秋千之出沒呼臬雉而彌雄飲長鯨而不竭瓊樓蕊
榜四照晶熒畫稅雕楹九枝突兀不懲魚鑰之踈寧飭
雞人之忽令寬擊柝之防歡洽履端之月士女駢闐兒
童徵逐墮舄遺鈿摩肩擊轂膳合五鯖壺凝百福傀儡
迴旋魚龍起伏朗啓瑤堂暖融金屋盤紛麴繭之遺釵
聚神姑之卜惟

聖朝之俗美處樂歲而風淳仰卿雲之載煥瞻麗日之
重輪暢休風於佳節溥同樂於

皇仁調玉燭以晻藹起祥光而炳麟十五葉冀舒殿陞

千百國物荷陶鈞秉燭盡嵩呼之侶扶鳩悉華祝之人
淑景三陽集韶光大地來春臺熙皞民無僻
恩幄崇源禁復開

泊鵝山房集卷十四終